

gewiß ist/ vnd mit Freuden sagt: Mir ist die Kron der
Berechtigkeit beygeleget. Also sol ein jeder Christ
auch von sich sagen: Mir / ja eben mir / ist die Krone der Ge-
rechtigkeit / die Krone der Ehren vnd Herrlichkeit / die vnver-
welckliche Krone im Himmel beygeleget vnd wolverwahret /
vnd weis gewis / wenn ich dahin kommen werde / daß mir sie
der gerechte Richter Christus Jesus auffsetzen wird / drum
wil ich mich für dem Tod nicht fürchten / weil er nichts anders
ist / als ein Promotor vnd Beförderer zu der Krone des ewi-
gen Lebens. Das sey auch einfeltig vom andern Stück geredt.

Ehrliche vnd herrliche Nachge- dächtnis dieser wolseligen Wittwen.

WAs nun anlangt die weiland wolgeborne Frau/
Frau Eva / geborne herrliche Freyen von Schön-
burg / des weiland wolgebornen Herren / Herren Al-
brechts Schencken / Herren von Landtsberg / Herrn zum Lei-
ten / Bucholtz / Teupitz vnd wüsterhausen nachgelassene nun-
mehr auch wolselige Wittwe / were es zwar billich vnd recht /
das ihrer Gn. bey derer Sepulcr zum allerbesten gedacht /
vnd das ihrer Gn. Lob vnd recht Christlicher vnd gottsfürchti-
ger Wandel nach Würden gepreiset / vnd andere zu derglei-
chen schönen Christlichen Tugenden angemahnet würden /
vmb welches willen auch die Leichpredigten angestellt vnd
gehalten werden / wie der weise Man Sprach im 44. Capitel
seines Büchleins bezeugt: Laßt vns loben die berühmte
Leute. Vnd bald hernach: Ir lob wird nit vnter ge-
hen. Sie sind in Frieden begraben / aber ihr Na-
me lebt ewiglich. Nun haben solches lob ihrer Gn. sehr

Memoria
defunctæ.

Syr. 44.